

आकाशवाणी रायपुर (छत्तीसगढ़)  
प्रादेशिक समाचार (छत्तीसगढ़ी)

1810 बुधवार

23.10.2024

प्रमुख समाचार –

- 1— रायपुर के इंदिरा गांधी कृषि विश्वविद्यालय में काली ले सुरु होवेह्या “चार दिवसीय राष्ट्रीय किसान मेला अंड कृषि प्रदर्शनीय” के आज मुख्यमंत्री सुभारंभ करीन।
- 2— रायपुर दक्षिण विधानसभा उप चुनई बर आज भारतीय जनता पार्टी के प्रत्यासी सुनील सोनी अंड कांग्रेस उम्मीदवार आकाश शर्मा ह नामांकन भरीन।
- 3— छत्तीसगढ़ उच्च न्यायालय के मुख्य न्यायाधीस रमेश सिन्हा ह काली बेमेतरा म कुटुम्ब न्यायालय भवन के ऑनलाइन भूमिपूजन अंड सिलान्यास करीन।

राष्ट्रीय किसान मेला

रायपुर के इंदिरा गांधी कृषि विश्वविद्यालय में काली ले सुरु होवेह्या “चार दिवसीय राष्ट्रीय किसान मेला अंड कृषि प्रदर्शनीय” के आज मुख्यमंत्री विष्णुदेव साय ह सुभारंभ करीन। एखर ले पहिली काली प्रदर्शनी के पहिली दिन “यूथ कॉन्क्लेव” के आयोजन होइस, जेमा युवा मन बर जॉब फेयर, अंतर्राष्ट्रीय एजुकेसन फेयर, स्टार्टअप मीट अंड एकेडेमिया-इंडस्ट्री मीट आयोजित होइस। ए जॉब फेयर म करीबन दू हजार पढ़ेह्या लइका मन ह भाग लीन। ए बेरा म कतकोन कृषि क्षेत्र म लइका मन के साक्षात्कार लेके पच्चासी झिन ल नियुक्ति पत्र दे गीस।

उहें, “इंडस्ट्री एकेडेमिक मीट” के चलत कृषि म अनुसंधान अंड विकास म दस कंपनी अंड विश्वविद्यालय के कतकोन संकाय के प्राध्यापक अंड वैज्ञानिक मन के बीच गोठ होइस।

मुख्यमंत्री-जशपुर

मुख्यमंत्री विष्णुदेव साय ह आज जशपुर जिला के भेलवां गांव म यूको बैंक के नवा साखा के सुभारंभ करीन। ए मउका म मुख्यमंत्री ह करीबन चालीस झिन स्व-सहायता समूह के महिला सदस्य मन ल चौबीस लाख रुपिया के चेक घलो दीन। श्री साय ह किहीन कि भेलवां गांव म बैंक के साखा खुले ले फरसाबहार अंड ओखर तीर-तखार के रहइया लोगन मन ल फायदा होही।

उहें, स्थानीय लोगन मन ल बैंक ले जुड़े कामबूता बर अब अंड जादा सुविधा मिल सकही। संगेसंग माईलोगिन मन ल आत्मनिर्भर घलो बनाय जा सकही।

उहें, मुख्यमंत्री ह आज बगीचा विकासखंड के स्व-सहायता समूह के इककीस झिन बिजली सखी मन ल बिजली कीट दे गीस। ए मउका म मुख्यमंत्री ह सबो माईलोगिन मन ल बधाई अंड सुभकामना दीन। जानबा के अनुसार जिला प्रशासन कोति ले स्व-सहायता समूह के माईलोगिन मन ल मीटर रीडिंग के प्रसिक्षण देके ओमन ल बिजली सखी बनाय गेहे। बिजली सखी कोति ले नियमित रूप ले मीटर रीडिंग करे जाही। जेखर ले बिजली उपभोक्ता मन ल बेरा राहत बिजली के बिल मिले लगही। संगेसंग एक घर म मीटर रीडिंग करे ले बिजली विभाग कोति ले बारह रुपिया के भुगतान बिजली सखी ल करे जाही।

### रायपुर दक्षिण—नामांकन

रायपुर दक्षिण विधानसभा सीट बर तेरह नवंबर के होवइया उप चुनई बर आज भारतीय जनता पार्टी के प्रत्यासी सुनील सोनी अउ कांग्रेस उम्मीदवार आकाश शर्मा ह नामांकन भरीन। ओखर संग सांसद बृजमोहन अग्रवाल, जिलाध्यक्ष जयंती पटेल समेत पार्टी के कार्यकर्ता पदाधिकारी मन रिहीन। श्री सोनी ह पचीस अक्टूबर के एक घांव फेर नामांकन भरही। उहें, आकाश शर्मा ह काली चौबीस अक्टूबर के अपन नामांकन के दूसर सेट जमा करही। नामांकन भरे के ए प्रक्रिया ह पचीस अक्टूबर तक चलइया हे, जेखर जांच अट्ठाईस अक्टूबर के करे जाही। उहें, उम्मीदवार मन ह तीस अक्टूबर तक अपन नाव वापिस ले सकही।

### उपचुनाव राजनीतिक दल

रायपुर जिला प्रशासन ह रायपुर दक्षिण विधासभा उप चुनई के तियारी ल सुरु कर देहे। कलेक्टर डॉक्टर गौरव सिंह ह राजनीतिक दल के प्रतिनिधि मनके आगू ईवीएम अउ वीवीपैट मसीन के पहिली रेण्डमाईजेसन करे गीस। एखर बाद चयनित करे गे ईवीएम बैलेट यूनिट, कंट्रोल यूनिट अउ वीवीपैट मसीन म दरज आईडी नंबर समेत सूची राजनीतिक दल के प्रतिनिधि मन ल दे गीस।

उहें, उप चुनई म मतदान ल लेके निजी स्कूल म पढ़इया लइका मन ह मतदाता जागरूकता रैली निकालीन। जेमा लइका मन ह सतप्रतिसत मतदान के नारा लगइन अउ कतकोन स्लोगन के माध्यम ले मतदाता मन ल जागरूक करीन।

### भारत ब्रैंड चना दाल

केंद्र सरकार ह आज ले भारत ब्रांड चना दाल के बिक्री के दूसर चरण सुरु कर देहे। केंद्रीय खाद्य मंत्री प्रहलाद जोशी ह बतइन कि भारत चना दाल केंद्रीय भंडार, मोबाइल वैन, नेफेड अउ ई—कॉमर्स ले सत्तर रूपिया प्रति किलो के दर ले दे जाही। एखर अलावा चना ह अंठावन रूपिया, भारत मूंग दार एक सौ सात रूपिया अउ मसूर दार नवासी रूपिया प्रति किलो मिलही।

### बेमेतरा कुटुम्ब—न्यायालय

छत्तीसगढ़ उच्च न्यायालय के मुख्य न्यायाधीस रमेश सिन्हा ह काली बेमेतरा म कुटुम्ब न्यायालय भवन के ऑनलाइन भूमिपूजन अउ सिलान्यास करीन। ए मउका म ओमन ह किहीन कि सरकार के प्राथमिकता प्रदेस के सबो जिला म सर्व सुविधायुक्त न्यायालय अउ आवासीय भवन उपलब्ध कराना हे, जेमा सबो प्रकार के सुविधा होही। जेखर ले इंहा अवइया मन ल कोनो परेसानी झन होवय। मुख्य न्यायाधीस ह किहीन कि भवन के निर्माण काम पूरा होय के बाद कुटुम्ब न्यायालय के अधिकारी अउ करमचारी मनके काम करे के क्षमता घलो बाढ़ही।

जानबा के अनुसार बेमेतरा कुटुम्ब न्यायालय भवन के निर्माण अट्ठारा हजार वर्गफीट म होही, जेला पंद्रह महिना के भीतरी पूरा कर ले जाही।

## सूरजपुर कलेक्टर—बदले

भारतीय प्रशासनिक सेवा के अधिकारी एस. जयवर्धन ल सूरजपुर जिला के कलेक्टर बनाय गेहे। उहें, वर्तमान कलेक्टर रोहित व्यास ल जशपुर जिला के कलेक्टर बनाय गेहे। एखर ले पहिली काली राज्य शासन ह सूरजपुर जिला के पुलिस अधीक्षक के घलो स्थानांतरण करे रिहीस।

## अधिकारी कर्मचारी वेतन

प्रदेस के कतकोन अधिकारी, करमचारी अउ मानसेवी मन ल देवारी तिहार के पहिली वेतन दे जाही। वित्त विभाग ह एखर बर आदेस घलो दे देहे। जेखर अनुसार अधिकारी—करमचारी मन ल वेतन अउ मजूरी के पइसा अट्ठाईस अक्टूबर ले दे के निरदेस दे गेहे। उहें, व्यवसायिक सेवा ले जुड़े करमचारी मन ल घलो मानदेय अट्ठाईस अक्टूबर ले दे जाही। राज्य के निगम, मंडल, प्राधिकरण, विश्वविद्यालय, स्थानीय निकाय, सार्वजनिक उपक्रम अउ आने संस्थान ल घलो अपन वित्तीय स्थिति के अनुसार अट्ठाईस अक्टूबर ले भुगतान करे बर केहे गेहे।

## दुर्घटना

बिलासपुर जिला म आज बिहनिया होय एक रद्दा दुर्घटना म दू झन मनखे के मउत होगे। बताय जात हे कि सिरगिट्टी गांव करा स्कूटी म सवार दू झिन मनखे मन ल ट्रक ह टक्कर मार दीस, जेखर सेति ओखर मनके मउका म ही मउत होगे।

उहें, सकित जिला के पिसौद गांव म स्कूली लइका मन ले भरे एक गाड़ी ह अनियंत्रित होके सोन नदी म गिर गे, जेखर बाद गांव वाला मनके मदद ले लइका मन ल बाहिर निकाले गीस। सबो लइका मन ल तुरते अस्पताल ले जाय गीस। जानबा के अनुसार ए स्कूली गाड़ी म पंद्रह झिन लइका रिहीन अउ अब सबो सुरक्षित हवय।

## संक्षिप्त समाचार

- राज्यपाल रमेन डेका ह आज उज्जैन के महाकालेश्वर मंदिर म पूजा—पाठ करीन। ए बेरा म ओखर संग रानी डेका काकोटि ह घलो रिहीन।
- राष्ट्रपति द्रौपदी मुर्मु ह छत्तीसगढ़ अवइया हे। उंखर ए प्रवास के दउरान रायपुर के पुरखौती मुक्तांगन ओपन संग्रहालय ल चौबीस अउ पच्चीस अक्टूबर के पर्यटक मन बर बंद राखे जाही।
- मोहला—मानपुर जिला के जनपद पंचायत कार्यालय म काली कौसल विकास पखवाड़ा सिविर लगाय गीस, जेमा तीन सौ ले जादा जवान लइका मन ह भाग लीन।
- जांजगीर चांपा जिला के गाड़ापाली गांव के हसदेव नदी म रेत के अवैध उत्खनन चलत हे। ए मामला म खनिज विभाग के ठीम ह दू ठिन चेन माउंटेन ल जब्त करे हे।

\*\*\*\*\*  
\*\*\*\*\*